

還當扶護寄住客性欣然鮮脫本性明白恩體如故
或時於彼无明意中化出諸魔即共新人意體關戰如其是人
忘失本意當有記驗其人於行多有過廢客主二性俱被染汙
如其是人記念不忘愚癡若起當即自覺速能降伏策勤精進
成就智惠寄住客性因善業故俱得清淨明性意體湛然无穢
如是五種極大關戰新人故人時有一陣新人因此五種勢力
防衛怨敵如火世界諸聖記驗憐愍以像持世明使誠信以像
十天大王具足以像降魔勝使忍辱以像地藏明使智惠以像
催光明使為此義故過去諸聖及現在教作如是說出家之人
非共有礙妄身相戰乃是无礙諸魔盡性互相關戰如此持戒
清淨師等類同諸聖何以故降伏魔怨不異聖故或時故人兵
眾退敗惠明法相寬泰而遊至於新人五種世界无量國土乃